

АШАЛЬЧИ ОКИЛЫ - 120 АР

# Ас лякытэныз бордаз кыскылыз



Ашальчи Окилэн нимыз удмурт литератураын, калык пöлын адзем карымон инты басьтэ. Аръёс орточо, нош Лина Григорьевнаен эшъяськем, чöш ужам адымиос, чыжы-выжыосыз асьме пöлын уло на. Кыче вылэм Ашальчи Окимы улонын, уж дорын, лек тыложын - сое асьмеос очеркъясьсы, гожтэтъясьсы лыдзиськом. Туннэ газетамы печатласькомы атаезья матысь чыжы-выжыезлэсь Тамара Васильевалэсь тодэ ваёнъёссэ.

Лина Григорьевнаез трос дышетскем, визьмо, туж лякыт но зеч мылкыдо адымиен тодам возисько. Пинал дырысеныз ик тазалыкез ляб вал ке но, калыклы котьку шуныт кариськиз, юаз-вераз, визь-нод сётылыз. Котырысьтыз вань адымиос сярсь тодэмез потыз, ачиз но милям пумтэм юанъёсмылы мылысь-кыдысь валэктон сётъялэз.

Тодисько на, кызы литературез гажамез сярсь вералляз: врач дышетскыкуз но литфаклэн лекциосаз одиг-ог ветылэм. Зйбыт сямо адыми, ноку өз ушъяськы, улонын кыче ке шуг-секытъясын пумиськылэмез сярсь чемысь вералоз вал. Кылбуръясь сярсь вераськон жутыку, öжытак пальпотыса шуоз вал: «Пинал дыръям вырысько вал, лэся, гожъяны».

Кутскыса-кутскыса мадылыз кызы сое арестовать карыса тюрьмае пуктызы, ярам коть, шудэз вылэм на: кема өз возе. Война вылтй фронтын ортчытэм аръёсыз сярсь но вералляз. Тужгес но фронтын нырысь вакытаз секыт вылэм. Дышетскемезья син эмъясь врач, нош со пöртэм операциосыз лэсьтоно лувлэм. Укыр шуныт вазыскылыз со фронтсы эшез -

Можгаысь Алевтина Калетина сярсь. Со воксё паймылыз солэн ужаны быгатонлыкызы но зйбыт сямзылы.

Нош макем юн сюлмаськиз Лина Григорьевна аслаз чыжы-выжыосыз сярсь! Уката но бадзым саклык висъяз соослы, кинъёслы улонын тужгес но секыт луылыз. Кылсярсь, племянницаез Елизавета Николаевна Векшина огназ кык пинальёссэ будэтйз. Та семьяез ялан син аяз возиз, быгатэмезья юрттйз. Бератаз Елизавета Николаевна пиез МГУ-эз йылпумъяз.

Лина Григорьевна доры визь-кенеш курыны лыкто вал кызы ке огшоры ужась адымиос, озы ик трос тодйсь-валасьсыз но.

Ачиз кадь ик йöно вал апаймылэн кузпалэз Иван Иванович Карачёв но. Со Алнаш ёросын гурт возёсыя управлюющей луыса ужаз, котьку калык пöлын вал. Доразы пырась-потасез ноку өз бырылы: угось соослэн кыкназылэн но улонзы калык понна вал.

Бастэмьин М. Петроваен но Л. Нянькинаен дасям «Та буртчин чуръёсыд (Эти шёлковые строчки)» книгагысь тодэ ваёнъёс люкетысьтыз.

## Удмурт кылбурчмы

Кин меда малпаз,  
Кин меда тодйз  
Грах ёросысь удмурт гуртысь  
Востэм но кепырась нылаш  
Луоз куке но дано эмъясь?  
Нош көня чебересь чуръёс  
Гожъяз ас вакытаз.  
Репрессия улэ шедьылыз,  
Адзиз ма со война.  
Öз сётскы секытлы.  
Ваньз-ваньзэ чидаз  
Оки - удмурт кылбурчмы.

Алина Кузьмина,  
Кузёбай школа.

## Буре вайыса

Оштолэзьлэн ньылетй нуналаз,  
Дас укмыс даурлэн секыт аръёсаз  
Вордскиз пичи ныл, Лина нимазы,  
Анай-атаез шудбур сизызы.  
Чырткем ик будйз удмурт нылашмы,  
Потйз валамез, тыршиз тодыны.  
Грах но алнаш музъемез яратйз,  
Уно калыклы шумпотон со ваиз.  
Угось тросэзлы виль адзон со кузьмаз,  
Уно синъёсты со эмъяз,  
Бадзым ож пыртй потонэз но адзиз,  
Тау Инмарлы - улэпкын со бертйз.  
Кылбур дуннез узыр Окилэн.  
Данья шаермес, удмурт кышноез.  
Кылбурчи Окилэн, удмурт эмъясьлэн  
Кылиз ук эзмос паськыт пытыез.

Ангелина Ильина,  
Кузёбай школа.

## Пумиськонъёс

# «Кельто-а мон пыты та улонам?»

15-тй южтолэзе ёросысьтымы Усо школаын тодмо удмурт гожъяськыслы, журналисты, дышетйсьлы Николай Васильевлы сйзем пумиськон ортчиз. Со лы туэ 85 арес тырмысал. Ужрадэз дасы дышетонъя ёрос управление, Усо школа но «Вордскем кыл» журналлэн редакциез. Пумиськонэ пырыськызы Дышетонэз азинтонъя институтын, Удмурт Элькунысь йöскалык библиотекаын, «Кенеш» журналлэн но «Зечбур!» газетлэн редакцияз ужасьёс. Ужрадэз усътызы школалэн директорез Сергей Головкин, Усо муниципал кылдытэглэн кивалтйсьез Юрий Мишин, «Вордскем кыл» журналлэн валтйсь редакторез Павел Баженов, дышетонъя ёрос управленилэн кивалтйсьезлэн воштйсьез, «Удмурт Кенеш» огазеяськонлэн Алнаш ёзэтэныз кивалтйсь Галина Павлова. Ачим мон Николай Васильевлэн библиотекаын утиськысь ужъёсыныз но йöскалык электрон библиотекаен тодматй. Школалэн директорезлэн воштйсьез Надежда Платонова верамъя, Николай Васильевлэсь нимзэ но творчествозэ вöлмытон понна трос лэсьтйське Усо школаын. Татын гуртысь оgezлы урамлы, озы ик ошмеслы, писательлэн нимыз сётэмын, ужа творческой лаборатория, «В контакте» мерлыко вöтэсын нимысьтыз сэрег усътэмын. Куинетйзэ ни Усо школаын Николай Васильевлы сйзем пумиськонъёс радъяськыло. Дышетйсьёс но нылпиос Николай Васильевлэн улон но ужан

сюресэныз тодматйзы, лыдзизы кылбуръёсэ, солэн кылъёсызья гожтэм кырзанъёсты быдэстйзы. «Ой, тй чебер ныльёс» кырзан удмурт, зуч, бигер, англи но немец кылъёсын чузъяськиз. Тодэ ваёнъёссэз веразы лыктэм куноос, кылсярсь, Экономика наукаосья кандидат, элькунысьтымы калыкез утён удысысь дано ужась Анатолий Матвеев но Н. Васильевлэн Иван агаезлэн нылыз Лидия Прокопьева. Музее Лидия Ивановна кузьмаз песяенызы куэм чалма, кышет, жöккышет. Ужрадэ Можга но Алнаш ёросъёсысь, Татарстанысь Огырчи ёросысь дышетйсьёс но нылпиос вуылйзы. Пинальёс ньыль секциосья ужазы: кылбурчиос, кылысь кылэ берыктйсьёс, суредаськысьёс но исследовательёс. Котькуд ужзэс дышеткысьёс Николай Васильевлэн творчествоныз герзазы. Витетй секциын дышетйсьёс ужазы. Вань вормисьёс пусьемын вал дипломъёсын. Удмурт Элькунысь Дышетонэз азинтонъя институтысь тьюторской уреж азинтонъя центрлэн кивалтйсьез Андрей Клементьев йылпумъянъёс лэсьтыса пусйиз:

- Шумпотымон, пумиськон удмурт кылын мынйз. Тросэз удмурт дэремен лыктэмын вал, ужрадын быдэсак «Усо шöм» кузёяськиз. Азыланяз Николай Васильевлэсь ужъёсэ вöлмытонэз азинтоно, 5 ар кустын гожъяськыслы сйзем виртуальной музей кылдытоно. Нош шаерчи Евгений Эжбаев чектйз «Воргоронъёс берто» романэз нимаз книгаен печатланы.

Светлана Вордакова,  
Йöскалык библиотекаысь öнерчи.



Ижкарись куноос

## Нылпи садъёсысь иворъёс



## Туала вакытэ этнокультураез дышетонлы адскымон инты висъяське.

Нылпи садысен ик пинал тодыны кулэ, асьме музъем вылын трос пöртэм калыкъёс уло шуыса. Котькудйзлэн вань аслаз вераськон кылыз, йылолъёсыз, лулчеберетэз но мукет. Соин ик атыкай музъемдэ яратоно но соин данъяськоно, мукет калыкъёсты гажан мылкыд но покчиысен ик пычатыны кулэ.

Туннэ нуналлы нылпи садамы визьнодасъёс азын валтйсь ужпум луэ, котькуд группаын удмурт кылэз валан но соин вераськыны дышетон, вашкалаосмылэсь кылзэс но лулчеберетсэс утён. Но, жалыса верано, нылпи садамы тросэз пинальёсмы зучомеымы. Ми, визьнодасъёс, понна со сюлэмшугъяськытысь югдур луэ. Соин ик пичиысен пинальёслы удмурт кылэз яратон мылкыд пычатон вылысь уж нуськом. Группамы вань луонлыкъёс кылдытэмын, удмурт калыклэсь лулчеберетсэ, сям-йылолъёссэ утён понна, оглом вераса, анай кыллэсь данзэ будэтон нылпи садамы зеч радъямын. Анай-атайёслэн юрттэменызы кылдытй Удмуртилы сйзем сэрег. Арнялы огпол удмурт кылын занятимес нуиском, отын пöртэм вашкала арбериосын, дйсен тодматкыськом, удмурт шудонъёсын шудйськом. Озы ик пöртэм ужрадъёс радъяськом, кылсярсь,

пересъёслэн нуналзылы сйзыса «Гаял апай дорын - куноын» шулдыръяськон ортчытй. Мöйыосын огазын кырзамы-эктймы, азыло вакытэз тодамы вайимы. Крезьгурья кивалтйсьмы Татьяна Леонидовна Медведева покчиосыз удмурт эктонъёслы, кырзанъёслы дышетэ, «Пичи устойчив» кружок нуэ на. Озы ужаммылэн емышъёсыз шумпотто ни. Кылсярсь, Василиса Васильева «Пичи Чеберайёс но Батыръёс» нимо 6-тй элькун нылпи фестивалез пырыськыса «Визьнодй» луиз. Нош «Кырзан вордске сюлэмын, сюрес шедьтэ калыкын» уло-скуспо конкурсын кыкез ныльёсмы Софья Смирнова но Василиса Васильева кыкетй инты бастйзы.

23-тй южтолэзе милемлы шудусиз Ижкарэ вуылыны. Отын «Пичи ныл но коньпиос» удмурт выжыкыл возматймы. 4-тй элькун фестивалын «Устойе сценарий» номинациын, дипломен пусйизы. Тйни озы тэк пукыны дырмы öвöл: кырзаськом, вераськом, эктйськом, удмурт кылмес данъяськом, тодон-валанмес узырмытйськом.

Нош анай-атайёслы дэмламе потэ: пинальёсыныды анай кылын вераське, эн возьдаське удмурт кылмылэсь. Пересъёс юнме уг шуо вал: «Мултэс кыл тодэм - котомка уг куры».

ТУСПУКТЭМЫН: Ижкарын ортчез фестивалез пырыськем нылпиос.

Галина Антонова,  
«Берёзка» нылпи садысь визьнодас.